



做囡仔時代

細漢的時陣，讀冊去學校用步輦差不多愛點外鐘。毋過，因為阿爸佇電力公司食頭路，拜一的時陣，會使順繼坐交通車。有一項毋好的所在就是愛較早起來。有一擺我青磅白磅從去坐車，阿母煞對後壁逐過來，共冊包對頭前傳過來，逐家攏知我干焦趕欲坐車，煞袂記得愛揸冊包，這馬想起來實在真見笑。

以早一年仔的學生傷濟，上課愛分早起抑是下晡。有一擺是中晝才去讀冊，同學佱我行到位的時陣，感覺時間猶閣冗剩，就去溪仔邊掠魚耍水。等時間袂赴矣，才緊對小路從去。無拄好，拄咧修路，小路煞變做兩枝長長的竹篙，行佇咧竹篙面頂，若準跋落去下跤，後果是不堪設想。我規個人愣佇遐，真正是叫天天袂應，叫地地不靈。我那行那掣，到今這個記持猶深深刻佇我的頭殼內底。

讀五、六年仔的時，就真正是無閒頗頗。早起時仔去到學校，全班佇教室咧溫習的時陣，老師攏愛叫我寫一寡仔題目踎烏枋予同學練習。有時陣是國語，嘛會使是數學，老師講據在我欲寫啥物攏會使。不而過，我嘛有變無步的時。欲寫欲出的題目攏寫了矣，姑不而將，家已出題目。有一擺出數學煞一時失覺察，重耽去，按怎算都算袂出來，實在有夠落氣。

下課的時，別人是走去迤迤，阮是愛去合作社鬥賣糖仔餅。因為福利社的小姐，一個人干焦兩肢手，跤手無夠應付規大陣的囡仔。頭一擺予挨挨啖啖，吵甲天篷強欲掀起來的囡仔疔驚死。個手伸甲直直直，倚佇一格一格的鐵窗仔頭前，一號、八號、十二號，嚨喉喝甲梢聲，就是為著會使食著糖仔餅。

逐家咧運動埕參加升旗典禮的時陣，我佱一个一粒一的 má-tsih 是旗手，愛配合音樂，沓沓仔共旗仔升起去面頂。

中晝食飯的時，我佱 má-tsih 愛去放送音樂。彼當陣猶是烏色的曲盤。講誠實的，有的曲盤，阮嘛毋知好聽抑是歹聽，歌聲放落去就著矣！無好聽才閣換另外一塊。

我的囡仔時代，遐爾仔心適閣趣味，到今，猶是會深深的數念。

作者：田美瑜

☆詞彙學習☆

- | | |
|--|---|
| 【步輦】pōo-lián：徒步、步行。 | 【重耽】tîng-tân：事情出了差錯。 |
| 【青磅白磅】tshenn-pōng-pèh-pōng/
tshinn-pōng-pèh-pōng：突如其來。形容出乎意料的突然來到或發生。 | 【挨挨啖啖】e-e-kheh-kheh：摩肩接踵、擁擠雜沓。眾人成群結隊，場面很熱鬧。 |
| 【冗剩】liōng-siōng：寬裕。 | 【梢聲】sau-siann：聲音沙啞。 |
| 【據在】kì-tsāi/kù-tsāi：任由、任憑。隨意而為，不受拘束。 | 【一粒一】it-liáp-it：最投契的。 |
| 【失覺察】sit-kak-tshat：不留神、疏忽。 | 【曲盤】khik-puānn：唱片。一種利用機械錄音方法記錄聲音的膠製圓片。 |